



جَبَاتَانِ هَالِ اَهْوَالِ اِغَامَا اِيسْلَامِ نَغَرِي سَابَاهِ

JABATAN HAL EHWAL AGAMA ISLAM NEGERI SABAH

اَلْخُطْبَةُ الْجُمُعِيَّةُ

KHUTBAH JUMAAT PERTAMA DAN KEDUA

15 Rabiulawal 1448H/28 OGOS 2026M

“JIWA MERDEKA: PERJUANGAN BELUM SELESAI”

Disediakan oleh:

Jabatan Hal Ehwal Agama Islam Negeri Sabah (JHEAINS)

Arahan kepada PTA/ PPMD/ AJK MASJID/ SURAU :

- » Seksyen 97, Enakmen 3 Tahun 1995, Enakmen Kesalahan Jenayah Syariah 1995, Bahagian IV - Kesalahan Khutbah Jumaat menyatakan bahawa menjadi kesalahan bagi Khatib yang membaca khutbah Jumaat yang bukan disediakan, disemak atau diluluskan oleh Majlis dan boleh, apabila disabitkan, dikenakan hukuman denda tidak melebihi dua ribu ringgit atau penjara selama tempoh tidak melebihi satu tahun atau kedua-duanya sekali.
- » Khatib hendaklah menyemak terlebih dahulu Khutbah ini sebelum disampaikan kepada para jemaah supaya sempurna rukun dan baris agar dapat disampaikan dengan fasih dan lancar.
- » Khutbah ini hendaklah dibaca oleh Imam Kariah atau Imam Rawatib yang bertugas di masjid atau surau yang berkenaan kecuali ada kebenaran khas dari Jabatan Hal Ehwal Agama Islam Negeri Sabah (JHEAINS).
- » Khutbah hendaklah disampaikan pada tarikh dan masa yang ditetapkan oleh JHEAINS.
- » Khatib tidak dibenarkan meminda isi perkataan dalam khutbah ini kecuali untuk menyempurnakan rukun khutbah, kesilapan ejaan dan baris pada ayat-ayat al-Quran dan Hadis yang terkandung di dalamnya.
- » Khutbah hendaklah disampaikan dalam tempoh 10 - 15 minit sahaja.



Mohon semak kod QR ini jika ada sebarang cadangan penambahbaikan. Sekian, terima kasih

KHUTBAH PERTAMA

الْحَمْدُ لِلَّهِ الْقَائِلِ:

فَأَقِمْ وَجْهَكَ لِلدِّينِ حَنِيفًا فِطْرَتَ اللَّهِ الَّتِي فَطَرَ النَّاسَ عَلَيْهَا لَا تَبْدِيلَ لِخَلْقِ
اللَّهِ ذَلِكَ الدِّينُ الْقَيِّمُ وَلَكِنَّ أَكْثَرَ النَّاسِ لَا يَعْلَمُونَ.
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى حَبِيبِنَا وَشَفِيعِنَا مُحَمَّدٍ، أَشْرَفِ الْأَنْبِيَاءِ
وَالْمُرْسَلِينَ، وَعَلَى آلِهِ وَصَحْبِهِ أَجْمَعِينَ، وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ.
أَمَّا بَعْدُ، فَيَا أَيُّهَا الْمُسْلِمُونَ، أُوصِيكُمْ وَإِيَّايَ بِتَقْوَى اللَّهِ.
قَالَ اللَّهُ تَعَالَى: يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ.

SIDANG JUMAAT YANG DIRAHMATI ALLAH SWT,

Marilah sama-sama kita berusaha mempertingkatkan ketakwaan kepada Allah swt, dengan melaksanakan segala perintah-Nya dan menjauhi segala larangan-Nya. Sesungguhnya takwa merupakan sebesar-besar bekalan dalam kehidupan, dan dengan perbuatan terserbut Allah SWT mengurniakan keamanan kepada hati, keberkatan kepada umur, serta kesejahteraan kepada sesebuah masyarakat. Khatib ingin mengingatkan para jamaah agar memberikan tumpuan sepenuhnya kepada khutbah yang akan disampaikan. Jangan berbual-bual, tidur dengan sengaja, ataupun bermain telefon bimbit, kerana perbuatan tersebut boleh merosakkan pahala solat Jumaat. Sebaliknya, mendengar khutbah dengan penuh perhatian adalah sebahagian daripada kesempurnaan solat Jumaat. Mimbar pada hari yang mulia ini akan membicarakan khutbah yang bertajuk: **“*Jiwa Merdeka: Perjuangan Belum Selesai*”**.

JAMAAH JUMAAT YANG BERBAHAGIA,

Alhamdulillah, kita kini berada dalam bulan yang mengingatkan kita kepada satu nikmat yang amat besar, iaitu nikmat kemerdekaan. Pada 31 Ogos setiap tahun, kita sebagai rakyat Malaysia memperingati Hari Kebangsaan, mengenang perjalanan panjang bangsa dan negara dalam membina sebuah kehidupan yang merdeka dan berdaulat. Tambahan pula bagi kita sebagai rakyat negeri Sabah, tarikh 31 Ogos juga mempunyai makna yang tersendiri. Ia bukan sahaja mengingatkan kita kepada kemerdekaan negara, bahkan tarikh itu juga telah diisytiharkan sebagai Hari Sabah, yang mengajak kita mengenang sejarah, menghargai bumi yang kita diami, serta menyedari amanah yang dipikul untuk memelihara keamanan, keharmonian dan kesejahteraan negeri ini. Sesungguhnya kemerdekaan bukan sekadar sebuah peristiwa untuk dikenang setiap tahun. Ia adalah satu nikmat yang wajib kita syukuri dan menjaganya dengan sebaik-baiknya. Syukur kepada Allah bukan sekadar dengan menyebut: "Alhamdulillah, kita telah merdeka." Syukur yang sebenar ialah apabila kita memelihara kemerdekaan itu dengan amanah. Kita menjaga keamanan dengan tidak menyalakan permusuhan. Kita menjaga perpaduan dengan menghormati perbezaan. Kita menjaga negeri dan negara ini daripada pengkhianatan yang boleh menggadaikan masa depan generasi akan datang. Kerana kemerdekaan yang tidak dipelihara dengan amanah, sedikit demi sedikit boleh terhakis sehingga akhirnya membawa kepada kehancuran.

JAMAAH JUMAAT YANG DIKASIHI ALLAH SEKALIAN,

Sememangnya keamanan dan kemerdekaan adalah nikmat yang wajib disyukuri. Namun, pada masa yang sama, mimbar ingin mengajak jamaah sekalian untuk sama-sama kita merenung erti kemerdekaan yang sebenar. Adakah kemerdekaan membawa maksud kebebasan tanpa

batas, sehingga kita boleh menjalani kehidupan kita semahunya? Ataupun ia mempunyai makna yang lebih tinggi daripada itu? Bagi menjawab persoalan ini, marilah sama-sama kita menghayati satu misi utama agama Islam bagi umat manusia.

Sesungguhnya Islam datang untuk membebaskan manusia daripada pelbagai bentuk belenggu, bukan sekadar belenggu fizikal seperti rantai besi, tetapi juga belenggu kejahilan, kesesatan, hawa nafsu, penindasan dan ketundukan kepada selain Allah SWT. Islam tidak membebaskan manusia agar hidup tanpa batas, mengikuti segala kehendak dan keinginan sesuka hati. Sebaliknya ia datang untuk membebaskan manusia daripada menjadi hamba kepada harta, pangkat, kemewahan, populariti dan hawa nafsu. Islam mengembalikan manusia kepada kebebasan yang selaras dengan fitrah penciptaannya; iaitu kebebasan seorang makhluk yang mengenal Penciptanya, bebas daripada tunduk kepada selain-Nya, dan dengan penuh kesedaran memilih untuk mengabdikan diri hanya kepada Allah SWT. Inilah fitrah sebenar bagi manusia, sepertimana yang disebut di dalam firman Allah dalam surah ar-Rum, ayat 30 yang dibacakan di awal khutbah tadi **yang bermaksud:** *“Maka hadapkanlah dirimu (engkau dan pengikut-pengikutmu, wahai Muhammad) ke arah agama yang jauh dari kesesatan; (tetaplah atas) fitrah Allah yang Dia telah menciptakan manusia menurut fitrah itu. Tidaklah patut ada perubahan pada ciptaan Allah; Itulah agama yang lurus, tetapi kebanyakan manusia tidak mengetahui.”*

Maka, inilah kebebasan yang sebenar: bukan bebas daripada segala aturan, tetapi bebas daripada segala yang memesongkan manusia daripada fitrahnya; bukan bebas daripada pengabdian, tetapi bebas daripada menjadi hamba kepada selain Allah; kerana manusia diciptakan

bukan untuk menjadi hamba dunia, tetapi untuk menjadi hamba Allah SWT.

MUSLIMIN YANG BERBAHAGIA,

Jika dahulu manusia diperhambakan dengan rantai yang dapat dilihat, hari ini perhambaan hadir dalam bentuk yang lebih halus dan tersembunyi. Ada yang menjadi hamba kepada **media sosial**, sehingga masanya dikawal oleh skrin. Ada pula yang menjadi hamba kepada **populariti**, sehingga nilai dirinya diukur dengan pujian dan jumlah pengikut atau *followers*. Ada yang menjadi hamba kepada **harta dan material**, sehingga kekayaan menjadi ukuran kebahagiaan. Begitu juga ada yang menjadi hamba kepada **hawa nafsu**, sehingga keinginan sendiri menjadi penentu halal dan haram, bahkan ada yang menjadi hamba kepada **arus pemikiran dan budaya**, sehingga apa yang popular dianggap benar dan apa yang diredai manusia lebih diutamakan daripada apa yang diredai Allah SWT. Allah SWT mengingatkan dalam surah al-Jathiyah, ayat 23:

أَفَرَأَيْتَ مَنِ اتَّخَذَ إِلَٰهَهُ هَوَاهُ وَأَضَلَّهُ اللَّهُ عَلَىٰ عِلْمٍ وَخَتَمَ عَلَىٰ سَمْعِهِ وَغَلَّبَ عَلَيْهِ
وَجَعَلَ عَلَىٰ بَصَرِهِ غِشًوَةً فَمَنْ يَهْدِيهِ مِنْ بَعْدِ اللَّهِ أَفَلَا تَذَكَّرُونَ ﴿٢٣﴾

Maksudnya: “Dengan yang demikian, bagaimana fikiranmu terhadap orang yang menjadikan hawa nafsunya sebagai tuhan, lalu Allah menyesatkannya berdasarkan ilmu-Nya, serta memeterai pendengaran dan hatinya, dan menjadikan penutup atas penglihatannya? Maka siapakah lagi yang dapat memberi hidayah kepadanya sesudah Allah? Oleh itu, mengapa kamu tidak mengambil peringatan?”

Dalam ayat ini, Allah tidak mengatakan orang itu menyembah berhala ataupun sujud kepada matahari atau bulan. Tetapi Allah menyatakan bahawa hawa nafsunya telah menjadi tuhan. Apabila manusia hanya mengikut apa yang disukai tanpa lagi mempedulikan halal dan haram, betul atau salah, maka ketika itulah hawa nafsu telah mengambil tempat yang sepatutnya hanya milik Allah. Rasulullah SAW juga pernah memberikan satu peringatan yang keras tentang perhambaan kepada harta dan materialistik. Dalam sebuah hadis yang diriwayatkan oleh saidina Abu Hurairah, baginda bersabda **yang bermaksud:** *“Celakalah hamba dinar, hamba dirham dan hamba pakaian. Jika diberikan kepadanya, dia reda; jika tidak diberikan kepadanya, dia marah.”* (Riwayat al-Bukhari)

Rasulullah SAW mengingatkan bahawa manusia boleh menjadi “hamba” kepada harta dan kepentingan dunia apabila hatinya terlalu dikuasai olehnya. Persoalannya, kepada siapakah kita tunduk? Jika kita dikuasai harta, populariti atau hawa nafsu, kehidupan akan dikawal oleh semua itu. Namun, apabila kita menjadi hamba Allah SWT, kita akan bebas daripada tunduk kepada selain-Nya dan hidup dalam ketaatan serta keredaan Allah.

MUSLIMIN DIRAHMATI ALLAH SWT,

Mimbar menyeru dengan mengalu-alukan kehadiran para jamaah sekalian untuk bersama-sama memanjatkan doa kesyukuran dan menunaikan Solat Hajat Sempena Hari Kebangsaan dan Hari Sabah Tahun 2026 yang akan diadakan di Dataran Bandaraya, Kota Kinabalu pada 31 Ogos 2026. Majlis pada hari ini merupakan wadah untuk kita memanjatkan kesyukuran atas nikmat keamanan dan kemakmuran yang dikurniakan Allah SWT. Marilah kita bersama-sama mendoakan

kesejahteraan, keselamatan dan keharmonian negeri Sabah serta negara Malaysia. Semoga majlis ini mengeratkan ukhuwah, menyuburkan semangat cintakan negara dan memupuk kesatuan dalam kalangan masyarakat. Dalam memperingati nikmat kemerdekaan yang dikurniakan kepada negeri dan negara kita, marilah kita berusaha memerdekakan diri daripada belenggu dosa dan hawa nafsu. Merdekakan akidah daripada syirik dan khurafat, hati daripada riak dan hasad dengki, akhlak daripada dusta dan rasuah serta pemikiran daripada kejahilan dan kebatilan. Sesungguhnya kemerdekaan yang sebenar bukan hanya bebas daripada penjajahan, tetapi membebaskan jiwa untuk taat kepada Allah SWT. Marilah kita kembali kepada Allah dengan hati yang bersih, jiwa yang tenang dan kehidupan yang sejahtera. Sama-sama kita jadikan firman Allah SWT dalam surah as-Syu'ara' ayat 87-89 sebagai pedoman:

وَلَا تُخْزِنِي يَوْمَ يُبْعَثُونَ ﴿٨٧﴾ يَوْمَ لَا يَنْفَعُ مَالٌ وَلَا بَنُونَ ﴿٨٨﴾ إِلَّا مَنْ أَتَى اللَّهَ بِقَلْبٍ سَلِيمٍ ﴿٨٩﴾

Maksudnya: “Dan janganlah engkau hinakan aku pada hari makhluk-makhluk dibangkitkan hidup semula; hari padanya harta benda dan anak-pinak tidak dapat memberikan pertolongan sesuatu apapun; kecuali orang-orang yang datang menghadap Allah dengan hati yang selamat sejahtera (dari syirik dan penyakit munafik).”

بَارَكَ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

تيكس خطبة كدوا

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا مُحَمَّدٍ، وَعَلَى آلِهِ وَأَصْحَابِهِ أَجْمَعِينَ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ وَاعْلَمُوا أَنَّ اللَّهَ أَمَرَكُمْ بِأَمْرٍ عَظِيمٍ، أَمَرَكُمْ
بِالصَّلَاةِ وَالتَّسْلِيمِ عَلَى نَبِيِّهِ الْكَرِيمِ.

SIDANG JAMAAH YANG DIKASIHI,

Bersempena sambutan hari kebangsaan negara kita dan hari Sabah yang diraikan pada tanggal 31 Ogos, marilah kita menzahirkan rasa syukur kepada Allah SWT atas nikmat kemerdekaan, keamanan dan kesejahteraan yang telah kita kecapai. Kemerdekaan bukan sekadar bebas daripada penjajahan, tetapi turut menuntut kita menjaga keselamatan, mematuhi undang-undang dan melaksanakan tanggungjawab sebagai rakyat. Dalam kehidupan seharian, sebagai contoh tenaga elektrik memberikan banyak manfaat kepada masyarakat. Namun, penggunaannya perlu dilakukan dengan penuh berhati-hati dan mematuhi peraturan keselamatan antaranya ialah:

Pertama, elakkan mencero boh atau memasuki kawasan pemasangan elektrik yang dikhaskan untuk petugas yang diberi kuasa. Patuhi papan tanda, pagar dan penghadang keselamatan bagi mengelakkan kemalangan dan renjatan elektrik.

Kedua, elakkan memasuki atau melakukan aktiviti di kawasan yang mempunyai tanda amaran bahaya elektrik. Patuhi segala arahan keselamatan demi melindungi diri dan orang lain.

Ketiga, elakkan melakukan sambungan elektrik secara tidak sah atau haram. Perbuatan ini bukan sahaja melanggar undang-undang serta haram di sisi syarak, malah boleh menyebabkan litar pintas, kebakaran, kerosakan pemasangan, renjatan elektrik dan kehilangan nyawa.

Justeru, semangat kemerdekaan hendaklah disertai dengan sikap bertanggungjawab terhadap keselamatan bersama. Sebarang kerosakan atau keadaan berbahaya hendaklah segera dilaporkan kepada pihak yang bertanggungjawab. Sesungguhnya, menjaga keselamatan, mematuhi undang-undang dan memelihara nyawa serta harta benda

merupakan tanggungjawab kita bersama dalam mempertahankan kesejahteraan negara yang merdeka.

فَقَالَ اللَّهُ تَعَالَى: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا. اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ كَمَا بَارَكْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ فِي الْعَالَمِينَ إِنَّكَ حَمِيدٌ مَجِيدٌ.

آمِينَ يَا رَبَّ الْعَالَمِينَ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ. اللَّهُمَّ أَنْزِلِ الرَّحْمَةَ وَالْبَرَكَاتِ وَالْهُدَايَةَ وَالسَّلَامَةَ وَالسَّكِينَةَ وَالصِّحَّةَ الدَّائِمَةَ عَلَى مَلِكِنَا كِبَاوَه دُولِي يَغْ مَا مَوْلِيَا سَرِي قَادُوكْ بَكِينِدَا يَغْ دَفَرْتَوَانْ أَكُوغْ وَعَلَى فَحَامَةِ الرَّئِيسِ الْأَعْلَى تَوَانْ يَغْ تَرَاوْتَامْ يَغْ دَفَرْتَوَانْ نَكْرِي سَابَه. وَاجْعَلِ اللَّهُمَّ هَذِهِ الْبَلَدَةَ وَسَائِرَ بِلَادِ الْمُسْلِمِينَ أَمْنَةً مُطْمَئِنَّةً، إِنَّكَ رَءُوفٌ رَحِيمٌ.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْفَحْشَاءَ وَالْمُنْكَرَ وَالْمِحْنَ وَالْفِتْنَ، مَا ظَهَرَ مِنْهَا وَمَا بَطَّنَ، مِنْ بَلَدِنَا هَذَا خَاصَّةً، وَمِنْ بُلْدَانِ الْمُسْلِمِينَ عَامَّةً، إِنَّكَ عَلَى كُلِّ شَيْءٍ قَدِيرٌ.

Ya Allah, Ya Rahman Ya Rahim, Bantulah saudara-saudara kami yang tertindas di bumi barakah Palestin, dan di setiap pelosok alam yang dicengkam kezaliman. Jadilah Engkau sebaik-baik Pelindung yang memayungi mereka, Penolong yang mengubati duka lara mereka, dan Penyokong yang meneguhkan langkah mereka.

Ya Allah, ampunkanlah dosa kami dan dosa kedua ibu bapa kami. Peliharalah institusi kekeluargaan kami agar dipenuhi dengan *sakinah*, *mawaddah* dan *rahmah*. Jadikanlah rumah tangga kami sebagai madrasah yang menyemai iman dan ketakwaan dalam diri anak-anak kami.

Ya Allah, kurniakanlah kami rezeki untuk sentiasa mengikuti sunnah Rasulullah SAW, berpegang teguh dengan petunjuknya, meneladani

akhlaknya yang mulia dalam kehidupan seharian kami, sehingga kami bertemu dengan-Mu dalam keadaan reda dan diredai.

Ya Allah, naungilah kehidupan negeri dan juga negara kami dengan Rahmat-Mu. Hiasilah diri kami dengan sifat terpuji dan jauhi kami dari sifat yang keji. Satukanlah hati kami dalam menegakkan kebenaran dan mencegah kemungkaran. Perelokkanlah pekerti kami dengan jalinan perpaduan, sentiasa berlapang dada dan mengutamakan sikap tabayyun serta ilmu dalam setiap tindakan.

Ya Qadiyal hajat, jadikanlah kami dan keturunan kami orang-orang yang istiqamah mendirikan solat secara berjamaah di masjid, menunaikan zakat, berpuasa pada bulan Ramadan, mengerjakan ibadah haji, mewakafkan harta dan berinfaq pada jalan yang Engkau redai. Ya Allah, kurniakanlah kami kekuatan agar dapat menghadirkan diri dalam solat Subuh, sebagaimana ramainya kami hadir menunaikan solat Jumaat pada hari ini. Sesungguhnya hanya kepada-Mu jua, Ya Allah tempat kami mengadu dan memohon pertolongan.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ
الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ،
فَاذْكُرُوا اللَّهَ الْعَظِيمَ يَذْكُرْكُمْ، وَاشْكُرُوا لَهُ عَلَىٰ نِعَمِهِ يَزِدْكُمْ، وَاسْأَلُوهُ مِنْ فَضْلِهِ
يُعْطِكُمْ وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.

Disediakan dan diedarkan oleh:

Bahagian Penyelidikan dan Informasi, Jabatan Hal Ehwal Agama Islam Negeri Sabah

Nota:

Teks khutbah ini mengandungi potongan ayat-ayat al-Quran dan hadis Rasulullah SAW.
Mohon jaga dengan cermat dan tidak disepahkan.

Sebarang pertanyaan atau maklum balas, sila hubungi:

Unit Penerbitan, Bahagian Penyelidikan dan Informasi, Jabatan Hal Ehwal Agama Islam Negeri Sabah

No. telefon: 088-522127

E-mel: jheains.penerbitan@gmail.com